

國

朝

詩

鐸

國朝詩鐸卷二十三

錢唐張應昌仲甫編輯

風俗

秦鏞四誠詩見勸民門

商盤江右紀風詩分見別門

都梁山 化民俗也

朱 頰

武岡接蠻域漢時國都梁晉武分置縣厥名曰武剛自古好鬪狼梁代改武強峰形左右峙武岡稱自唐公綽平蠻碑高文繡鸞鳳未復升爲軍州治於以倡巖洞紛相錯雜處亦跳梁攀嶺捷援狻猊佩刀肆披猖邇來漸化

久無敢臂螳螂高隴布麻麥低田栽稻秧蠻歌聽侏儸
天籟調宮商其俗樸而儉可以保富穰其性直而贛可
以免譎張尙氣頗堅確好義頗激昂一言不肯食質實
無他腸中有衣冠士云登鼓篋堂衆人豔且羨悔不師
文章熒掖若有術儼然君子鄉此理如驅雞此政如牧
羊去害善乃安深山成虞唐

朱陳村歌

吳壽宸

樂天曾賦朱陳村我今更覩朱陳民相違千載生苦晚
昔聞未信今見真衆人且莫囂聽我歌朱陳我來正逢
二月春桑麻滿野青鋪棊機梭軋軋響中屋牛驢砧砧

行平原山深縣遠風氣古女脩織經男鋤耔兩姓締好
傳世婚舅弟甥舅情頗殷有酒皆家釀有肉皆園豚黃
雞白菜各歡會相要醉倒田家盆年高似飲菊泉水客
至喜逢桃花源不羨估客樂豈肯丁從軍死徒無出鄉
况乃生與存我也暫行役不久還鄉粉青鞵布鞵甘我
貧不信但看村中人

京師
樂府戲園

蔣士銓

三面起樓下覆廊廣庭十丈臺中央魚鱗作五蔽日光
長筵界畫分眈疆僮僕虎踞豫守席主客魚貫來觀場
充樓塞院簪履集送珍行酒傭保忙衣冠紛紜付典守

酒胡編記皆有章礎刀過處雨毛血酒肉臭時連士商
臺中奏伎出優孟座上擊磔催壺觴淫哇一歌衆耳側
狎昵雜陳羣目張雷同交口贊歎起解衣側弁號呶將
曲終人散日過午別求市肆一飯充饑腸我聞奢者示
儉有古訓情游侈逸不可無隄防近來茗飲之居亦復
貯雜戲遂令家無儋石且去尋旗槍百日之蜡一日澤
歌詠勞苦歲有常有司張弛之道宜以古爲法毋令四
民一一皆若狂

京師樂府 唱南詞

又

三絃掩抑平湖調先唱攤頭與提要高談慷慨氣麓豪

細語纏綿發忠孝洗刷巫雲峽雨詞宣揚卻月披風貌
冠纓索絕共歡譁玉筯交頤極傷悼密意感人最慘悽
談言微中真神妙君不見杭州士女垂垂手聽詞心動
鸞鳳偶父母之命禮經傳私訂婚姻小說有

和熊蔚亭方伯虎邱覽俗詩

原詩以吳俗冶遊富商大賈糜費而無業

貧民口食有賴蓋有爲而作也因和之錄

祝德麟

虎邱名刹占青峰寺外山塘七里衝百貨市廛如海幻
三春游女比花濃珠樓繡閣憑空起錦纜牙檣逐處逢
不是揮金買歌舞怪囊豈易漑吳儂

賦罷吳趨賦狹邪十千美酒百千花朝朝暮暮歡蹤續

歲歲年年治興賒但使閭閻無凍餒未妨風俗習豪華
游民萬指閒田少何處催桑更勸麻

吳錫麒觀燈行見奢侈門

吳趨行

程際盛

吳中實名都佳麗古所誇閭閻連雲起邑里紛喧譁飛
甕夾馳道耀彩浮朝霞高門盛豪俠大戶矜繁華遂令
民俗媮醜讌窮驕奢至德仰遺徽山水清且嘉文學播
遐邇禮讓敦其家所重在返樸永言戒浮夸懷古思土
風遠望空咨嗟願詠山樞詩龜勉思無邪

陳聲和北行樂府

琵琶女
鼓兒詞

見倡優門

吳趨行

吳翌鳳

吳趨佳麗地長洲冠蓋區雕甍壯華屋鮮袿照路衢清
歌憐趙女錦帳陋齊奴珍肴不知名酒上正豐腴甯知
窮巷士時作庚癸呼車馬何方來挾持一何都白壁千
黃金瑟瑟大秦珠公孫崇節儉此物非所須脫粟及布
被皆言與人殊

樂鈞嶺南樂府分見各門

洪州傷侈俗

羅安

物力有盛衰世風有今古後輩不復知聽取老人語老
人生長洪州村兒時所及猶能言爲言洪俗本近古自

來土瘠兵燹繁戍已變後創初復父兄力穡子弟敦車
器服物有典則婚姻戚故無繫援客至酒三巡不厭老
瓦盆果蔬隨時具笑語一何溫歲時慶謁只麤服寸絲
不上腰體裨但見華裾盛裝爭夸耀彼此駭怪不欲相
齒論邇來風俗頗異是太平日久漸奢靡耕夫紅女誰
憫勞坐享租稅長驕侈尋常作會動萬錢山珍海錯羅
都市卜晝卜夜恣號呶飲食糜費若流水牆屋被文繡
臧獲飾統綺泥土視珠襦縑素輕敝屣愚夫效尤不足
訶儒生從衆胡爾爾饕餮奇淫忘所誠舉世同波識者
鄙昔聞儉爲德之共高曾遺矩在孫子是誰開導淫巧

門國絀民貧端由此何人爲陳風俗書使唐魏民還淳
美

陳文述吳門燈船行見奢侈門

吳趨
吟男工繡

孫源湘

錦繡纂組害女紅於今此事兼傷農終年荷鋤不得飽
不如穿鍼易見巧穿鍼勿學縫衣裳入時學繡雙鴛央
垂髻男子十四五列坐紅窗靜如女爲他人作嫁時衣
素手偏工壓金縷繡袍五尺春雲疊抖擻香風消百摺
美人玉立稱腰身拖地長裾罩華屨四圍蝴蝶珠穿成
十戶中人衣一襲交龍鬪鳳色淺深聰明費盡男兒心

閨中一度春風著。三月功夫弄繡鍼。繡鍼眼無一黍大。賴此全家衣食過。家中姊妹畫雙蛾。妝成袖手終朝坐。

蠶螟蛉子

斤亂宗也。潮人以丁多爲強，乞養他人子，非獨單門然也。甚有貌爲鞠育，包藏

禍心者，更多故矣。異姓亂宗，功令宜斥。

黃安濤

螟蛉子多奚爲，曰以保族撐門楣。老無兒嗣厥後吁可怪。九子母傷人抵罪，李代桃平時豢養同豕牢。給貲行商涉洪濤，割蜜飼蠟酬其勞。性命謬相託，恩義良已薄。一朝反脣乃交惡，此孽由來君自作。

凡認養子不肖者，指爲螟孽。

服妖

夏之盛

俗尙敝，因人心服之。裘心之淫，始自冠履及衣衿。維鷄

在梁誰與吟

一解

爾非隸回紇爾帽胡上銳爾非從戎

事爾衣胡短袂金沴木兮乃生戾

二解

夾衣荷花紅單

褶茄花紫道途屬目不知恥甘自覲顏學女子

三解

哀憐
真詠闖將

元璟

南京風澆多辣子北京俗悍有闖將甘心作孽行狹斜
大膽過人逞伎倆褻裘乘月喜莫當被酒攔街怒無狀
嗚呼安得都護下還使閭閻皆揖讓

祭祀

江若

蠶省祠堂

南昌人在鄉者多建宗祠於省藉作舍館訟者居之自此故家廢宅出售幾盡而遠

客稅駕之地稀矣亦一敝習也

商盤

南昌十萬戶聚族處四鄉如何省會區建此昭穆堂豈
盡霜露感徒滋雀鼠藏訟凶古有訓壽張難具詳遂令
俎豆地翻作軍旅場故居神所依妥賚安可忘

廢祠歎

陸玉書

前人尙義重報本後世僅能存大略甚且因之起爭端
良法美意變澆俗越人忠厚念本支一姓同居成村落
中營大廈爲祠堂更以良田綿嗣續每值春秋祭享時
子孫列拜序昭穆量入爲出定豐儉饗畢按名分祭肉
瓜瓞縣延終不紊善哉敦本兼睦族豈知日久弊自生
侵蝕有人入私橐始因缺乏偶移用久乃逡巡竟潛鬻

遂致合族動公憤家法不行煩案牘官呼兩造曉大義
婉轉開陳代敲扑子孫相校有親疏祖宗一視無厚薄
彼雖不肖公產侵爾須明義宗支篤後代子孫誼克敦
地下祖宗心亦足薄罰聊爲示小懲傷和必致爭端伏
聽者俯首無可言退商復墮他人局藉口族衆恐效尤
必欲官爲嚴訊鞠致令一本成仇讐公產徒然日駸削
侵者之咎固難辭訟則終凶何苦瀆久之各自抱主歸
祭祀家家從此獨春露秋霜孰致思祠堂空鎖巍峩屋
可憐青青茂草中新鬼淒涼故鬼哭嗚呼祖宗始意豈
及此人心不古乃反覆我爲太息作長歌孝子慈孫同

展讀

婚嫁

嫁女詞

蔡氏妹嫁女于吳孤嫠貧困艱辛百倍而婉婉柔順之教有素爲之賦嫁女詩

徐倬

哺燕終離巢養女終離孀
葦蘿豈無根因依松柏長
時俗重婚嫁貧富各相當
富家嫁女易羅列紫鴛鴦
貧家嫁女艱牽犬出東廂
耀首飾明珠不如荆釵光
明珠來海底荆釵取路旁
道遠富能致物微貧難將
三更秉機杼五更織流黃
織成絲千縷一縷一迴腸
銀燈理刀尺裁爲羅襦裳
衣服穩稱體嘖嘖羨新粧
誰知絡緯聲夜

夜啼寒螿嬌女頭上花阿母鏡中霜嬌女足下履阿母
手內瘡鹽豉充素盞詩書滿竹箱執卷相夫子調羹奉
姑嫜堂前拜慈訓淚落幾千行留兒伴娘影兒去娘空
房牽衣還繞膝出戶更徬徨此時母子意惻惻向河梁
河水深可測苦意密難量孔雀徘徊飛騶馬躊躕鳴嬌
女升車去阿母迴中堂中堂孤桐樹葉葉自低昂蛺蝶
飛相並芙蓉花蒂雙獨有娶婦家百年歡未央

嫁女詞

朱彝尊

唼唼重唼唼鴛鴦隨野鴨誰家可憐窈窕娘容顏精妙
意難量大姑生兒仲姑嫁小姑獨處猶無郎媒人登門

教裝束黃者爲金白者玉阿婆嫁女重錢刀何不東家
就食西家宿

異適
吟 財婚

邵長蘅

古人重嘉耦今人重財婚儷皮風已遠茲義誰能敦况
乃吳俗奢媒氏費較論既須計錢帛亦復矜高門西家
昨聘婦千金光爛爛紈綺三百匹文采何爛熳東家昨
嫁女資送紛紛繡繡祇冒箱笥流蘇綴琅玕五釵大秦
珠直可千萬緡錦繡照塗巷光彩溢里隣夫壻承咳唾
公嫗大歡欣亦有貧女嫁蓄簪青布帚三日向暗壁低
頭減容顏富女易驕妒貧女淑且溫富女熏香篝貧女

井臼勤胡不比較論富女不如貧

顧嗣立城西嫗篇見婦女門

新婚樂

寶應俗女子許字必責厚幣而後遣婿家貧輒相持過時有年至三十未嫁者邑令

熊君至令隣里相舉報貧者出俸錢助之違別罰其父兄一時怨女曠夫遂有室家之樂余過其地謳歌載道爲作是詩以備采風熊君名會玢安慶人

張鳳孫

新婚誰最樂相看各盛年
盛年何蹉跎六禮貧難全
婚姻薄俗計財帛兩家媒
灼多責言三春桃李開
復落一綫翻悔紅絲牽
前年令君來下符責隣里
嫁女勸及時否者且罪爾
貧來告我我給錢添汝一簪
兼一履滿城燈火刀尺忙
釵荆裙布催新粧鏡臺不用求
溫郎犢車

一兩相迎將三星在戶夜未央
熒熒花燭村酤香十年幽怨今始償
上堂拜舅姑回家拜父母低頭問兒夫
還拜令君否令君慈惠天下無
完爾家室圖爾居爾居安貧勤作苦
生男長大記熊父

敬 詩 買寶髻

顧夔璋

買寶髻嵌珠冠置婢媵飾梳奩
有錢竭筐箱無錢棄莊田母家不留
青玉案婆家還索金臂纏一時道路
誇嫁娶前羅旗幟後僕御百子輿中
百媚姝繡圍錦幄眞豪富誰知紈袴
易中落一擲千金頓蕭索昨朝著羅襦
今朝縛裋褐前作太倉鼠今嗟餅粟脫
百兩相將二姓窮

只因婚嫁過求豐論財况復古人戒胡爲世俗羣相從

固原

閻氏女

完人節也

爲固原吏目張傳心作

蔣士銓

翟家娶婦閻家嫁女花筵賓客洞房前簫管聲和卮共
舉哭聲不是尋常聲就中官爲側耳聽窮究婚姻得其
故擲盃大罵四座驚馬三之妻豈可奪羅敷况恥桑中
約寬爾鞭笞罰聘錢反踏天河半橋鵲馬家忽慶鴛鴦
飛翟氏空房笑變悲扶植人倫官有爲有爲不在官崇
卑

前題和作

周有聲

前堂羅酒尊後堂蕤明燭官人下馬來主家歡不足開

筵宴客客勿譁主人得婦顏如花錦屏合沓障春晝金
杯激盪傾流霞哭聲忽出重幃下哀哀不似悲新嫁鸞
鳳誰憐玉鏡分鴛鴦恐向青陵化官人聽事能聽聲何
况淒酸聽此聲當筵動色便相問威斷不能撓強民閭
氏女馬三婦翟家豈合稱佳耦黃金不惜買陽春白璧
安能著癡垢銀河浪靜無行露鵲橋重喚天孫渡紗籠
夜照玉人歸官人上馬從容去

嶽新嫁娘

孫源湘

東家娶婦西家空巷南巷北花幡紅前頭笙歌喧兩部
錦蓋如雲從如雨鏤金錯采五十箱羅紈綺縠裁禪襠

紫金步搖九雛鳳白玉條脫雙文鴛小珠玫瑰色大珠
明月光珊瑚寶石文犀瑪瑙一一填中央光彩照里隣
奢華壓郡縣瞠目走僮奴交口譽親串上堂翁嫗大喜
歡新婦下拜翁嫗蹙蹙不安母雞鳴起母供棗栗醢醢
酒醴中饋米鹽不得屑屑勞爾爾自有鏤金錯采五十
箱開箱羅紈綺縠香紫釵玉釧十二行大珠小珠珊瑚
寶石文犀瑪瑙一一填中央

源湘又有吳趨鬻女篇見婦女門

吳中
吟貧家女

周 瀛

古人重婦德不聞聘豪家豪家女嬌癡坐矜顏如花羅

綺累箱櫃脂粉遺泥沙盛飾壓親串妄自服六珈破產
不足惜破義乃足嗟何如貧家女淑質洗鉛華堂上供
旨髓佐夫儀柔嘉姆教甘食貧十指紉窗紗上緬賢媛
風鴻案而鹿車胡爲議婚者惑溺門楣奢

閒居雜詩

陳光緒

入城買釵釧渡江買綺繡問渠將何爲嫁女已及候薄
俗重厚奩以此密婚媾豈無有餘家女多家亦瘦壻家
不必貧女家不必富但視力所能百備不一漏嗟哉爾
何愚甘以奢靡鬪嫁女盡嫁金母乃計太謬不見劉凝
妻裝遣散親舊

武林

樂齋賣花婆

陳春曉

賣花婆秋娘雖老眼尙波時世梳妝街上走娉婷
嬈娜蠻腰佻生來出入朱門裏春風笑臉家家喜
賣花能得幾文錢且爲月老全憑背東家女顏如
花西家子才堪誇瀾翻舌底如簧口願作良媒定
不差主人有女求郎早聞言道汝牽絲好一紙紅
牋往復還三生秦晉諧偏巧酬汝酒酬汝金難得
花婆一片心誰知彩鳳隨鴉度遇人不淑遭摧挫
誤我明珠掌上拋彼婦之言堪面唾好姻緣變惡
姻緣賣花婆又他家過

又擺嫁裝

又

東家娶婦樂西家嫁女忙。三年刀尺縫衣裳。十年珠翠積盈箱。天孫雲錦何輝煌。珊瑚七尺長。復長金雕玉琢百寶裝。賓朋嘖嘖誇滿堂。女兒深閨苦不足。阿母添箱問所欲。門外乞婆來瑟縮。主人詈罵門者逐。乞婆來前致詞自言本。是豪家女。曾憶當初嫁時。花團錦簇亦如此。遇人不淑。旋傾否。手揮百萬烟花裏。今朝行乞到君家。願得青銅一錢耳。主人聞言怒益張。揮之使去。吝弗償。大呼排筵速舉觴。

又開房

又

賀新郎賀新娘新郎新娘嬌羞在房。少年作鬧何輕狂。

戲謔爲虐殊荒唐劉楨平視苦不足溘于執手如相忘
橫陳三兩合歡牀鼾臥顛倒角枕傍鼕鼕街鼓夜未央
容且歸去明星煌蘭闥深鎖雙鴛鴦銀釭斜背解明璫
用何低聲小語話正長畫眉之事只尋常豈知屬耳在紅
牆曉來調笑着新妝畫闌房夜闌房主翁無語坐畫堂
意取熱鬧兆吉祥亦有惱羞成怒忽參商此風可笑沿
餘杭

嫁粧

王文偉

越人重嫁女貧富分兩途富家衣飾易巧匠登門俱烏
雲壓金翠尤貴明月珠貧家連夜製銀釧紅羅襦急貽

券數紙旋割宅半區恐被衆親笑體面爭斯須最憐結
秦晉必欲援崔盧此猶燕新乳彼或牛垂胡有時佳婿
至雞肉羅庖厨館師餐飯薄能分一簋無

婚嫁

吳世涵

新婦堂前拜阿翁一身債女兒一頭珠阿翁百石租習
俗使之然諺語良非誣東家有長男衫屐翩翩度聘錢
苦難貫三十猶未娶西家有老女幽閣顰雙眉金奩苦
未備于歸知何時女生願有家男生願有室奈何百年
事爭此一朝飾十家九無成成者家已貧嗟哉兒女累
仰屋空生嘆婚嫁苦不速胡爲狃習俗不聞桓鮑家短

衣共挽鹿

荒親

又

古聖制典禮凶嘉不相假。麟經譏納幣矧乃事婚嫁。喪娶並聽離先朝法。毋赦期服而成婚。識者猶驚訝嗟哉。吾越俗荒親事可咤。厥親邁危疾厥子迎婦。姓名之曰冲喜飾語一何詐。更有親初沒秘喪事。迎迓堂上肉未寒。堂下輿已駕。哭者方在寢。賀者旋盈舍。豈意衰經中吉服。晤姻婭。豈意泣血辰花燭。問良夜。厥風沿自宋遺俗。久未化。至今人士家。紛紛相蹈藉。惜財費有幾。喪禮罪難贖。嗚呼。彘倫斃滔滔。方日下太息作歌詩。茲事何

時罷

邵梅宜薄命詞
見婦女門
何桂枝悲命詩

喪葬

蒿里變

徐倬

礮啾啾弦逢逢東鄰西鄰耳震聳豪家蒿里事不同
麻衣榛杖恣肉食琵琶箏笛總帷中名紙千張肆遠出
乘軒負販來如風堆山縑帛歸笥篋伸頭還望麥舟公
可憐磨鏡生芻客質衣脫袴歸船空細腰小兒如黃蠶
醜金奔走城西東西城又有烏衣族蚤上招魂晚就木
間白衣冠幾輩來靈前一個青蠅哭

周士彬石槨行見富貴貧賤門

地師

劉青藜

北邙山下鬼夜哭地師地師爾何毒膏脣歧舌太張皇
爭夸富貴由朽蠲寅年下葬卯年發唾手蓬門換華屋
死者停柩謀佳城既葬發掘更相卜魂驚魄散骨骸析
西移東遷徧厓谷鵲巢鳩處紛爭奪連枝同氣競反覆
三公豈盡折臂人九原何必眠牛域餘慶餘殃固有由
得馬失馬誰爲福寄語孝子與慈孫莫信人間有郭璞

洗筋行

江西惑堪輿南贛尤甚親葬二三年掘洗骨紅還故塚黑收新阡逾年復爾名曰洗

筋亦曰檢筋今丙寅夏憲司張師載奏其事禁之

陳梓

筋何人筋汝二人洗何人洗汝兒孫紅者還故冢黑者
營新墳新墳新色不轉紅再遷再洗無終窮紅紅黑黑
究何憑黑且達官紅作僧天良蚤盡喪地理將何徵君
不見南安九十九曲水紋縹胡爲產此紛紛食爺獸贛
州亦有鳳皇池生此叢叢啖母鷓愚民但說郭璞好郭
璞頭顱赤如寶銜刀廁間身不保

江右檢金悲陳死人也贛吉愚民葬其親隔歲一發

終不封

商盤

檢金黃家之祥檢金白家之索檢金不已荒冢屢徙設
崇置翠山之麓舊鬼愁煩新鬼哭月落林深漆燈綠

路山壟 息地訟也

朱 頌

我昔讀周禮冢人著遺篇但云營兆域族墓必相連葬
日有定制未聞吉凶遷青烏創何人乃以誣高賢景純
精易數拒敦生乃捐忠義自不死何必假神仙金山拍
天浪卜穴豈其然崇韜哭汾陽母乃名實懸後世規利
者其說多狂顛苟求富與貴左券操牛眠延師破巨萬
停柩累十年兄弟不並隤父子不同阡紛紛起爭競械
鬪多累產破額投訟牒匍匐公庭前一獄久不決橫飽
胥吏錢家業蕩然盡其愚真可憐死者尸委露生者突
無煙不孝莫大是何有福祿緣我歌路山壟聽者涕泗

漣陰地願勿擇曷爾擇心田

盲婦葬親篇

汪沈

人子之事親卜葬事乃已如何今之人慢葬昧於理邪
說惑地師遷延歲月駛一棺寄郊原淺土久忘矣期愆
禮經訓律背我 皇旨憤彼風水書一炬烈燭止陸冢
有盲婦少瞽不得視辛苦習彈詞素髮盈垂耳鬱鬱不
伸眉默默不見齒問婦何所憂清淚落如水三棺不克
葬抱恨入地死聞者憫其情釀錢忽填委畚築雖草草
猶勝風雨毀揮汗赤日中營葬在六月埋骨橫山裏盲婦嗟
何人我詩木鐸比

瑞金喜訟而惑地理陰謀侵逼有禍連數十年未
息者爲詠是篇

郭廷翁

謾謾澗底松搖搖嶺上柏中多邱與墳闕盡幾過客墻
頭無銅牌道陌無墜石世遠罕子孫髑髏誰能識東山
一丈土西隣爭一尺朽骨不能言任爾呼甲乙不謂陳
死人懷有古刀筆宋元舊文書模糊宋印漬詎此奇貨
居黠者乘其隙獄訟此繁興滋蔓無終極幾傾中人產
爭之復何益人生歸大暮安得萬古宅不見古帝陵臺
殿亂荆棘漆燈見人間玉鉏有時出何況閭閻兒萬分
不及一肆彼陰慮險饒倖圖饒蝕誰謂無天理而謂此

地發爾之祖與父與爾眞一脈坏土何恩怨酌水何疎
戚年年掃墓來各保毋旁惑且勿忽樵蘇等閒腰斧入

臨喪篇

金 姓

孝子哭方哀弔者顧大悅措語似非倫竊疑孟子說眞
性有時現疑義一朝決吾枕舊喪禮中外同慘切詎能
終日慟哀固有其節但隨賓進退稽顙輒哽咽正使淚
暫乾長號亦無輟用假愧亂眞猶勝禮全缺不知何年
起此響遂中絕總帳祇空懸寂若芻靈設我歸初見此
太息氣爲結其來誠有自何意染吾浙今朝到喪次觀
聽乃殊別號咷良僅見庶不負纒經余心亦增痛痛已

喜欲啞舊禮，冀終復譏彈。盡沛雪。

憫俗

二首之一
火葬詩

吳文暉

世人執喪用浮屠，吹螺擊鼓聲譟如。親朋嘖嘖交歎息，
有子如此死亦愉。旛幢導前行，靈輻從後舉。相送歸山
阿，未暇封尺土。仍用浮屠茶毘法，謂令死者得入西方。
伍長者鑿短者斧，擲毀棺開速厝。火赫然焰起如流虹，
驚魄暗泣生悲風。高天暗慘亦垂憫，嗟爾人子甯無恫。
須臾燼滅人散去，殘齒飄雪委霜露。饑烏啞啞飛下樹。

詩

宴白客

顧夔璋

宴白客釀麴糵，濡肉乾肉几。上列讀禮無人問，齒決戚

引戚來賓延賓主人不識是何人促席卷波復叫號孝
堂拇戰喧四隣酒熱脫去頭上布載歌載笑爵無數呼
盧喝雉聲嘈雜稍不如意徑嗔怒帷中不暇泣柩前酒
未慙惟此延客歡不敢稍吝惜白馬素車賻漫來蒿里
薤露唱何哀只因難供白客宴多少停輜不得埋

又
演靈劇

又

演靈劇伊何闕奠親柩當泣血雅樂何堪供幽咽已將
萊采換縗經云胡素旄飛郢雪賓朋雜沓男女譁笑聲
翻把哭聲遮不情絲竹攪魂魄靈鼗路鼓手空搥此時
棺中幸瞑目任爾游戲貽親辱倘教令威化鶴歸恐依

華表添憂蹙爲人子者縱非賢至性如何敢棄捐君果
破涕能爲笑坐客何難悲變歎

害冢

蔣士銓

閩客多盜葬鉛山無完墳長鑱斲前和鉤骨如探丸拋
棄不知處藏魄成游魂櫻包納其骸安寢前人棺墓前
立假冢拜掃淆僞真鑿石埋深山使長莓苔痕乃造買
穴券倒註年月旬舊尹新尹間竊用官印文可憐麥飯
香不辨誰兒孫及覺而互訟官視皆等閒十訟不一結
結亦非所論罰金買尺土姑令瘞者安豈知謀時心已
拌囊中錢或予笞杖罪受之顏欣欣敢惜敲撲細易此

牛眠眞土人失先壟飲泣寃莫伸安得良有司噓風掃
浮雲凡有盜葬者刻期開幕門遷之不待時鬼魅難逖
巡誰非斯人子罔恤戕亡親盜葬苟不理理之苟不遵
謹罰及有司庶策愴者愴君子有四端惻隱資賢臣
士銓又有三善詩之一見善政門

北邙山行

吳錫麒

朝望北邙山其下有車馬紛紛白衣冠云是會葬者豐
碑螭首高屹雲不知諛墓何人文白楊樹下悲風起故
鬼啾啾語新鬼幾家寒食奠酒漿幾處宿草眠牛羊華
表不歸千載鶴今古聚成一邱貉君不見炙手可熱勢

絕倫一朝棺翼纏其身門生故吏各自去誰是墳前下馬人。

崇壽

狸首斑

傷停棺也

客通州作

趙懷玉

狸首斑澤如沐一棺未埋一棺續漆闇塵凝同露宿吾聞古人未葬不入官葬苟踰期不除服胡爲遺殯淹歲時子又生孫若罔知富者常稱地難得貧者復謝囊無貲君不見西鄰昨夜火連屋孝子哀哀抱棺哭一炬難將百身贖

南山北山行

吳昇

南山北山兩峰高春風吹滿青蓬蒿中有壘壘古墳墓

野狐蹲踞猿悲號古墓纍纍新墓少殯宮何處埋幽草
荒原不信一坏無日日靈車出城早靈車鼓吹送城隅
卻向黃泉結做廬不見佳城歌鬱鬱居然夏屋詠渠渠
黃昏啾啾鬼相語春露秋霜仍野處故鬼驚心風雨侵
新鬼咨嗟無葬所薄俗紛紛說地師青烏三卷問誰知
欲把遺骸卜榮貴忍將朽骨置漂離漂離不顧情何忍
搜索翻令媼神窘越角吳根相度頻山巔水浹蒐羅盡
足趺鞵穿數十春相看又作白頭人一朝抱恨長辭去
也向荒郊卜比隣子旣不能葬其父孫亦何知念厥祖
世間幾許有錢人可憐無分埋黃土感此爲君涕漣漣

與君試步南山前，但見山前築土起新阡。山後荒塋平作田，墳頭趑趄犁起土三尺。哀哉白骨查牙道旁擲，須知此冢當年新築時。也會不惜黃金費千百。

正風水

陸玉書

仰以觀天文，俯以察地理。古聖闡精微，後人誤風水。聽信堪輿言，吉凶惟所指。一心博富貴，百計辨臧否。豈欲報罔極，徼福乃如此。富陽俗尤甚，積習不可已。因之多訟爭，案牘常纍纍。昨者俞氏族，衅因遷葬起。必求官履勘，親泣衆山裏。兩造互爭競，理各執一。是我爲察其情，笑語俞氏子。爾族數百家，營葬數千壘。死者鱗次葬，生

者聚族比歲時伏臘間祠堂設酒醴列坐別尊卑平行
序年齒敦本兼睦族祖宗大歡喜生者死者心同是此
情耳胡爲葬爾祖忽然亂倫紀卑反居其顛尊乃附厥
趾爾祖苟有知魂亦難安矣魂旣不能安錫福何能俟
人貴培此心陰陽那可恃古諺曾有言大地無庸買白
屋出公卿草茅紆朱紫都從積累來豈關邱壟美勉哉
勵文行亢宗從此始毋再惑風水風水半虛說

薤露篇

按事武林作

陳希曾

我上梯子田頽牆墜瓦紛相連我入青芝塢蟻戶蜂房
森可數如此青山骨不埋國殤公厲計殊乖生前猶記

樂土樂死後難得佳城佳使者來開攢屋新鬼故鬼同
一哭漆室殘燈有火燃黎邱幻鬼煩刑鞠春露秋霜空
涕淚祖宗靈爽非兒戲富室每多祈福心貧家誰篤通
財誼棠梨麥飯年復年何處豐碑問墓田搖落可堪風
雨嘆護持難恃子孫賢

橫蒲
蕭編竹籬 譏停柩也

吳照

華堂編竹籬半截遮靈柩先人骨肉乾未乾幽宅十謀
九不就他鄉異縣來葬師貌言樸訥衣布衣青烏金鑠
口爛熟尋龍點穴爭豪釐孝子立在旁再拜復長跪我
家停有三四棺先祖父母先考妣踉蹌不葬皆有由窮

鄉難覓好風水願躡峻嶺登高山從師訪求敢厭艱飽
君肥肉醉君酒富貴福澤非等閒東原山坳得真穴西
原峰尖更秀絕歡天喜地券立成瓦礫先驗猪牛骨名
爲印子色貴黃年月孝男書石碣孝子持家久廢書竚
望子弟光門閭塚中枯骨一得氣腰圍金帶朝堂趨倉
廩陳粟供飲博福祥未降家蕭索骷髏無知魂有知眼
眶空空淚難落吁嗟乎天道福禍由善淫親骨求福無
人心葬師流毒非自今

洪 形家惑
吟

羅安

山川而能語葬師食無所方回此言解人願只有形家

聞而怒嗟哉世俗惑難祛山崩鐘應信有諸不思心地

務種德乞靈坏土何太誣青囊一編貴拱璧遺鈴所在

多傳摹

形家預相作穴隱躍其辭使後人按而求之謂之鈴

郭君身且不自保暨

陽福地定屬虛

暨陽郭璞葬母處

徒將此書誤後人賢者不免

况其愚君不見洪州西山鬱層霧奇氣磅礴秀靈聚公

侯吉壤如粟麻踏破鐵鞋無覓處但見官長來尋山不

見官長來上墓萬金買穴竟何為祇為豪家供竊據連

年訟牒在公庭子孫零落誰能護復聞蒿里地停柩數

十年一朝被野火遺骸飛冷煙終天抱恨悔何及至今

人子淚潺湲淚潺湲心愴惻呂才卓論家諭難尙其墮

茲二事破積惑

贛南樂府

金罐

粵人尚堪與葬後必發視其骨色黃者易棺瘞原穴色黑者貯以窆罌名曰金罐更

求佳兆有數十年未就窆者

樂鈞

嘉應州皆然潮州亦有之

金罐夫何物。羸罌貯枯骨。纍纍遍空山。荒草半埋沒。死者靈不靈。生者求佳城。處處風水惡。年年霜露零。可憐金罐苦。偪仄游魂夜。夜尋幽宅。白楊蕭瑟青楓寒。舊日荒塋歸不得。忍暴親骸求福祥。忍用瓦塋同下殤。百年必盡生者死。殘骸亦入羸罌藏。形家所言理。或有覓得牛眠骨。已朽賓客吹簫盡。白頭松楸新種無人守。

哀淺厝

黃安壽

江南渴葬多送死習俗薄攢基一椽覆

吳下以停柩之屋爲攢基終

古淺土托今茲夏暑雨澤國成巨壑生者旣流離死者亦漂泊我歸經吳江晴久水始涸村家舊漲痕壤壁可約略游目未忍窮慘慘到岸腳樞柩何縱橫顛倒沙嶺閣想當潦盛時出沒浪中躍不知幾萬千殘齒付蛟鯨前年疫癘行鬼伯肆橫攫豈料怛化餘又被陽侯虐誰歟軫仁心掩骼高冢作招魂問水濱一例俱冥漠新故但蒼然氣類有淆錯天陰聲啾啾哀此一邱貉

瀛

翻金罐

或遷葬也潮俗溺于風水旣葬其親復出土火之兵之瘞骨以殮名曰金罐易

其虎曰翻甚至有屢遷而卒暴露者

又

翻金罐何其愚風水不知有與無爾祖爾父生何辜死
後不得安其居百鎰延堪輿千金買山地坏土猶未乾
掉頭旋復棄發邱斲棺析骸骨何異狐埋更狐措子孫
忍爲盜賊行富貴焉能異凶悖吁嗟金罐藏諸幽夜來
鬼哭聲啾啾牛眠吉壤如可求又有覬覦人巧偷

潮民又有

以地盜換埋骨者

森 陪喪客

陳春曉

晨曦黯無色入門弔客盈客去須客送客來須客迎孝
子居苦塊不能曳履行賴有親故輩敢請擯接更向曉
廳事集古道今已傾笑談恣詭虐近更炎涼生但聽門

前鼓客意殊分明。藍縷亦何恥。上堂衆相輕。紳珮素不識。降階羣相爭。日旰華筵設。人渴而酒清。那顧喪者側。豪飲有餘情。詰朝復相送。耀首皆冠纓。且喫到山飯。漸聞哀吹聲。匆匆雜拜跪。各自指歸程。澆俗已如此。執紼悲老成。

又 山老虎

又

廬墓難終身。孝子出山苦。魂夢常依依。山中一坏土。一坏土。十年樹鬱鬱。復葱葱。松楸賴有主。孰爲主。山老虎。恣意樵采。縱尋斧。墓前羊虎齊。傾頽翁仲無。言任輕侮。游子宦成歸。清明麥飯補。大木不成陰。根株猶可數。觸

目怒傷心亟令送官府吁嗟乎朱門豪族尙痛嗟何況
平民邱壟耶孤塚纍纍今不見剝爲平地售他家安得
山君真虎出弱肉強食厲磨牙

火葬歎

鄭敬懷

人死不入土久恐委溝瀆誰知更有慘于此忍心火葬
到骨肉掩骼埋胔仁政急慮其暴骨飽狸腹吁嗟火葬
出異俗如此曷若將骨暴骨暴猶得全其軀焚如只存
軀一掬嗟乎兄弟本同枝父兮母兮更將我撫育乃竟
忍心灰其軀哀哉何異遭殄戮雷霆罰之胡不速多少
荒郊鬼爭哭

荒冢行

梁紹壬

青鳥哀唳白猿叫林魑夜哭山鬼笑老松化作魑魅形
黑月森森石間照紅滿山花不作春冷風如刀吹殺人
回頭俯瞰荆棘處狐憑兔穴皆荒墳纍纍布似殘棋局
高者如垠下如堦欲問埋愁地下人摩挲沒字碑難讀
楊柳桃花三月春不知誰與奠孤魂古來富貴如夢幻
誰非王侯將相之子孫銀宮金屋如烟滅換得荒山一
明月綽約非無倩女魂風流亦有才人骨坏土同依作
棟家冢中可有舊冠裳杜鵑痛哭颺颺弔不值青山笑
一場君不見將軍袍笏埋荒草帝寢燈檠迹如掃但見

金蠶冷墓門何曾白鶴歸華表又不見六陵寶氣照山
川虎枕雲琴盡出棺石馬無聲翁仲淚空教遺恨滿林
巒何如片土營安宅長暮猶能妥殘魄錦鞵知無梨樹
悲玉簪幸免梅花劫吁嗟乎韋平阡碣半蒿萊回首牛
眠不敢哀誰是千秋萬歲後高名不與骨同埋

閒居雜詩

陳光緒

大夫三月葬士則僅踰月縣封有定期普爲春秋律今
人惑堪輿選地葬無日野厝苦寒暑屋殯防謔出日久
家或落窀穸貲已竭郭璞造葬書但求妥骸骨藉以博
富貴兒罪豈容髮棺槨未入土譬如居無室死不如速

朽聖言有爲發

攢屋哀

羅以智

新鬼故鬼啾啾哭雨齧棺朽風摧屋埋沒草中棺壘棺
道旁行人酸心目豈無子孫豈無知先靈未肯窀穸卜
罪彼不孝罪焉辭積習更痛成惡俗一坏土乾復何求
墓門茫茫鬱松楸紙錢一陌酒一滴魂兮何日歸山邱
對此如何不悲憫因循豈盡迫窮窘無故不葬法有誅
惑於風水尤可哂棺卽不朽屋不摧死者未安生者忍

攢屋謠

王乃斌

行盡山南與山北鱗排櫛比曰攢屋垣低似類野人家

風慘常聞新鬼哭分廛列舍如市居山中豪猾橫索租子孫處之不經意但求富貴謀堪輿終年登陟尋吉穴宛其死矣入此室漂搖風雨任摧殘惡俗相沿竟成習吁嗟乎一廛旣受將終焉從此逝者不得歸重泉

金鉢

泥甕也有蓋俗謂之金鉢

吳世涵

朝過北邙山纍纍見金鉢厥高二尺餘平乏盈尺闊野人負之來幽塚恣掘撥詢云將改葬斲棺檢骸骨貯之此鉢中攜往瘞靈窟古者不修墓聖言揭日月改殮必反寢衣襯詎敢忽仁人受遺體愛護及膚髮栝樵尙珍藏桑梓猶勿伐奈何戕親骸寸寸等劓刖願復勞其生

剗剔及其歿忍哉人子心厥罪勝斧鉞况復取攜便干
山憑抓拵往往盜人墓姦宄發倉卒吾聞西方教火葬
禍未歇及茲檢骨兒殘酷同蝮蠍疇能亟禁止告誠申
明罰沃澤賁重泉荒墳免駘脫

蒿里曲

夏之盛

古者喪祭各有禮今人越禮自親始匪惟越禮實兒戲
那識悲哀競華靡

解一

門外飛樓天可梯銘旌兀兀高

官題鼓吹徹衢陌儀衛列東西日暮弔者且麴至主人
匍匐憊不支

解二

昨宵罷祭天將旦靈輻戒塗日已冥

賓友滿湖莊梁肉都糜爛挽郎卓午尙未來萬人夾道

睽睽看

解三

噫吁嘻生者愜心死者痛窀穸杳無期浮

文亦烏用君不見瀟澤園中昨瘞棺當年冠蓋千人送

解四

積屍歎

嘉慶乙亥

又

鬼輿閃閃積屍氣湖濱厝棺無隙地舊者未瘞新續添

填湖作地莫措置

解一

摸金校尉毒于獍和頭燒穴圓

如鏡絞衾顛顛在脛紛紛南北山搶呼幾十姓

解二

不

問富與貧亦不問舊與新竊此何爲古未聞吁嗟乎賊

太狡鬼不嘔

解三

葬者藏也古之紀曷不窆窆早盡禮

誰無父母誰非人子我亦聞之輒驚起

解四

蒿里曲

曹真馨

妙選笙歌耀旗幟忍借親喪作兒戲靈輶峩峩遊市廛
嚮晨發引晡未至誰謂豪華如轉燭古苔繡遍前和綠
斲棺爲器賣入城旁人不知誇美木

掩埋

掩骼篇

爲陳剛青少尹賦

盛 燼

民生榮悴本無定博施濟衆堯舜病但於乍見萌惻隱
豈同秦越異類並所以古人月令篇埋齒掩骼有遺言
西伯恩澤及枯骨治岐餘績仁之端清溪累累白楊哀
天陰月黑鬼火堆生苦飢寒死委壑欄腰著雨長莓苔

荒原無主侯爲主作民父母心獨苦念彼暴露天何辜
萬物由來宜歸土陰風獵獵野火噓驚散蚋蛄走狐狸
支撐枕藉久捐棄咸使一旦安其居夜深星朗愁鱗息
羣鬼啾啾叩頭泣草莽朽腐沾恩膏將以何者爲侯德

紀石樓令袁梅谷瘞髑髏事

石樓古屈地闔賊屠
剿距今百餘年雍正

庚戌夏署西北隅露一枯髑掘之鱗次櫛比鱗
鏃剝缺爰瘞之義冢旁勒石歲奉祀焉是皆不
辱于賊之勇夫義婦也余旣嘉其嚴遂成
事又悲死者姓名湮沒詩以弔之

晉封夷吾地乃今石樓縣縣小山爲城居民昔逃竄隔
河近米脂劇賊首發難吹脣兵搜牢獻馘築京觀百年
槎枿級癩瘻漬刀箭是皆恥生降忍死就塗炭女不受

賊汚男不從賊亂中宵風月黑啾啾聲達旦里居旣蕩
析子孫亦糜爛誰復與招魂春秋澆麥飯袁君莅茲土
撫循法稱善餘波澤枯骨幽魂雪煩怨朱囊白木柙彙
附義塚畔而我想當時賊氛廣延蔓出入河南北流毒
天下遍安得百袁君各遂首邱願鬼亦異遭逢望空發
遙歎

同歸域詩

順治丁酉十一月鄭成功攻澄海之鵝汀堡鄰村入堡避賊者七萬餘人堡破

同日受屠有僧瘞之於隴子之原
題其禍日同歸域余和章純儒作杭世駿

聞道鷗汀戰火紅萬人同日殉臧洪游魂假息 王風
外害氣禁消佛力中日落飢鷺翻白骨雨深冤鬼哭青

楓書生也植如竿髮殺賊思彎兩石弓

掩骼篇

城東安化寺有廣場爲旅櫬寄葬之所余偕申鐵鑿孝廉兆定往游見暴露者十有

四棺令寺僧掩覆之答曰需錢一萬四千予與孝廉分任之越五日竣事作詩弔之

蔣士銓

安化寺中冢纍纍新鬼故鬼紛追隨生居五方不省識
死聚尺土相因依旅人賃地如賃居寺僧食租如食穀
棺存那管狐兔穿冢裂甯知髑髏哭尋秋有客聞鐘來
破墓入眼同悲哀本無金盃鎮石槨但有白骨生青苔
墓田何處正邱首貧者應須死速朽餒而甯借子孫在
廢矣難求翁仲守兩人出錢萬四千馬鬣十四俱隆然

生王死士終難保柳下能經幾百年

撿骸骨

卹死也○按此詩在川陝楚軍營諸篇之中

徐鏐慶

孟冬十月狂飈吼平地飛沙死人走死人萬萬來雙溝
雙溝夾河人血流流屍浪湧有時立烏鴉翻風半天黑
下啄死人腸腦出荒郊野狗瘦如豺餓與饑鳥奪人食
路人過此空長吁可憐屍骸滿路隅誰能灑淚上枯骨
只有襄陽諸大夫

澤骨行爲金岑齋少府作

己巳秋邑大饑少府奉大憲命賑卹凡荒塚暴

露者分俸掩之

戴蘭芬

三阿水清漪漪三阿城塚纍纍城東水漲苔痕紫塚中

棺破骷髏徙骷髏徒哭聲起新鬼煩冤舊鬼愁生者且
無食遑爲死者謀高軒巍巍五馬南來使君駐節惻然
心哀心哀賑民災出官俸助掩埋使君澤及枯骨何
况窮黎拜車轍嗚呼何况窮黎拜車轍

萬開燧途見餓莩詩見災荒門

塘東辜氏義冢行

慧霖

歲維癸丑秋七月西江大水苦難說不獨陽侯肆虐行
道逢荆棘死生決南州有土塘東辜志存廊廟身江湖
道中予予兩無據維桑與梓聲相呼似聞盜賊如蜂起
上至吉州下彭蠡洪都坐困兩月餘鄉里汪洋苦秋水

官軍不至義軍來貧者出力富出財一鄉稱善四鄉應
劍花斫地歌莫哀上流僵臥數身手嗟爾形狀殊多醜
泣雨漂風沈忽浮隨波逐浪無何有又聞羣鳥呼鳥鳥
不葬魚腹蠅蚋趨安得江邊一坏土埋此濡首沒頂之
殘軀君能不惜田一區掩之日費千青蚨素稱仁里敦
義族此風千載何能無噫吁嘻此風千載何能無

附錄

過湖上萬骨冢悲賦

杭城兵燹積屍如山枯骸載路城復收骸築數十大冢

於南北兩山題碣曰
義烈遺阡春秋祭祀

張應昌

齧骼欣蒙掩形骸慘不分一坏同混沌萬鬼雜紛紜義
骨成京觀寒燐結暮霧那堪仙佛地罹此劫灰焚

宋塔殘陵寢

元楊璉真伽發宋諸陵將以骨

築塔唐義士收骨別葬于山陰秦臺聳

體

赫連勃勃以戰

場屍築觸體臺豈如仁政澤慈卹義民儔恨乏山陰

客能分涇渭流古今千載事涕淚滿杭州

行旅

遊子行賁山西出秀才

馮景

親老不歸養卿爲無天地離鄉二十年釜鍾遠莫泊况
又鮮弟兄晨昏望誰視曾無銜索悲孤負倚閭淚不見
老萊子華顛學兒戲可憐反哺烏啄粟迴高翅養隆而
敬薄尙云非人類裘馬何翩翩音書亦懶寄可憶出門
時慈母理衣笥長鍼縫密線遲汝丁甯意故衣棄何許

新衣換佩璫臨歧千萬言今無一字記草枯還再榮人
老不復穉移汝外嬖心去作承歡事詩教本溫和巷伯
有當詈誰則生空桑昏昏明發寐生當懷令名死當畏
惡謚卿能悔心萌谷風不終棄

黃河大風行

沈用濟

黃河之水自天落我舟來向黃河泊遙看雲氣如飛龍
知有東南大風作大風一起天茫茫排山倒海不可當
浪花捲起高十丈虛擬沈牛截狂象危檣大艣撼不停
霎時飄散同流星高岸倒震鼙鼓裂怒濤亂捲蛟涎腥
暝來打篷聲軀膊半爲雨點半冰雹夕陽欲下風更狂

吹落孤帆天一角一舟重有萬鈞力漩入泥沙脫不得
一舟觸石摧鵲尾窺見青天在艙底水面一舟飛鳥輕
無枝可棲心目驚其餘溜急難鼓柁客船十箇碎兩箇
同泊尙餘四五船船船相觸繩相聯長年當風立至曉
我輩安得高枕眠近見青齊成水府况聞中州少安堵
皇天降災良有因汝曹定觸河神怒不爾風濤何太苦
男兒勿恃膽氣粗要知蹈險非良圖新河安穩路徑直
汝何不趨趨畏途豈惟黃河爲畏途波瀾平地無時無

渡河篇

錢以塏

行路難難於臨河千長橋蜿蜒忽傾圯褰裳欲渡波濤

寬征夫夜半戒行李揮鞭到此停征鞍况逢泥滑滑雨
漫漫長亭短亭行過半吞風飲露朝未餐大索渡船剛
一隻板片朽敗篙師單前行未渡後隊至岍南岍北注
目看驢馬雜還忽驚起行人排擠當危湍斯須不可測
對此摧心肝秋風七月尚如此那堪朔雪流澌寒君不
見乘輿濟人無足道徒杠輿梁政之端胡爲乎往來過
者望洋增長歎行路難告長官

下灘歌

許燦

紙船鐵梢工直下激浪衝濤中一灘未過一灘接迅雷
轟轟振秋葉左揮右揮面發頰但以手語無人聲梢工

非鐵船真紙十人乘舟九判死

釜有神一船主晨釜不鳴客莫語客若先之當禍汝不見後灘急浪如山來前灘石如鋸齒排但使人船安穩得神祐白酒黃雞報馮祖

去船破浪疾於駛來船牽縵百夫曳上灘苦難下灘易來船雖遲常得完去船雖疾多摧殘下灘苦險上灘安吁嗟汝曹且勿爭何如不作闔灘行

過牖

沈德潛

截流利轉漕險要閉版牖奔流挂丈餘玉虹下石硤驚霆擺礮礮鐘懸響鞞鞞未到耳先震乍覩氣已聾客舟

排檣竿喧逐亂鷺鳴懦者擢欲弭勇者浪堪踏長年理
戩篙鳴金衆夫集退行索齊挽逆上船疑立忘身與水
鬪性命輕於葉人定終有濟忽奪兩崖入中流自在行
安危判一睫出險更思險心定膽轉怯猛省戒垂堂未
敢貪利涉前途浩茫茫願言慎舟楫

過灘

盛錦

重峽間百灘一灘度一厄江渦衆壑趨壓口亂石積大
石疊黿鼉小石攢劒戟中流若沸川翻倒蛟龍窟牽舟
逼下流凜若阻兵革長篙拄峰腰遠纜走山脊鳴金策
衆工銳進不盈尺一絲中迸斷百里供一擲觸石無完

艘沈淵有驚魄是時雨初霽沙石多滑澤亡命爭上厓
匍匐落冠鳥婦孺互扶攜雞犬任狼藉暫脫魚腹災波
濤亦在席轉思斷鼇初四極奠磐石豈其禹力衰此境
終未闢天宰眞夢夢人事日偏窄寄語營利徒勿作遠
行客

蔣業晉新灘書事見盜賊門

江上見覆舟

張雲璈

江行終日居坎窞天遣書生來習膽江心突見有覆舟
使我魂驚顏色慘帆摧柁折長檣撓浪翻雨打兼風飄
不知旋轉幾晝夜船腹尙在中流拋此中無人有人骨

大半已飽千年蛟先時反覆防罅漏鐵葉連綴今猶牢
我怪舟行何不慎人言舟行莫太迅不愁上水愁下水
不怕風逆怕風順逆風下水尚可留上水順風未全趁
若教風水得兩兼快意中間安可問豈無千里一日還
願恐難酬事亦僅我揆其說方喟然中有至理存乎天
豈不見駿馬下坡猛于虎銜檠時時折其股更不見鷺
鳥疾飛高入雲毛血忽被罡風分老板聞言心乍懾遽
把高帆攔一葉

覆舟詩

徐錫禮

颶風怒捲海雲黑噴沫鯨魚作人立風水相迸浪走空

浪花堆出千瓊級。估舟東南來。陡然遇此風。初如江豚
翻波出。復沒又如飛鴻墮。箭身倒衝帆。掀舵折人束手。
倏忽顛落蛟龍宮。此風亦何惡。此水亦何毒。子母蠅頭
利。幾多萬里相從飽。魚腹年年水底結。冤魂鬼無新故
同。聲哭吁嗟乎。人生同一死。得所乃爲是。殉利必危身。
求福在知止。溺人應笑錦屏人。宦海風波亦如此。

覆車行

陶廷珍

危橋偪仄石骨頽。水聲漚漚車轟雷。兩驂窘步忽顛趾。
失勢一落雙輪摧。水入空箱泥滿袴。後車奔救前車下。
輿人愛馬如愛身。傷不問人先問馬。僕撫我背屈不伸。

我驚不怒僕已嘔，偃僕互掖並起立。怒鞭其馬兼及人，輿人前致辭。伊感客自貽，遇險盍避險。下車理則宜，客今自安坐。顛仆奚足奇，客身幸未傷。毀拆將咎誰，我聞斯言若聞道。始信疎虞怵年少，世路轆軻盡太行。飄蓬應歎風塵老，倏忽鴻毛性命輕。哲人尤貴知幾早。

官渡船

陳聲和

官渡船何處，艤官能濟人。客心喜年來，壘斷歸土人。其黨數十據，要津客昨停。舟時水深祇二尺，卻嫌礙輪蹄。散置嶙峋石，乘輿自濟勢不能。一船爭渡人俱登，客先過河隔河等。驅車上船船不肯，客裝雖輕客車重。如何

載以一葉艇此時客愁將奈何土人謂客須金多我輩
馮河得熟路百人肩可舁車渡解衣所苦天氣寒有酒
十千爲我酤客不言日將暮傾囊倒篋勿復遲已是前
途半程悞

二把手

又

二把手挽者在前推者後雨天雪地不敢走有時得意
如乘艦布帆三尺捲浪沙仰不高軒俯不軾坐客欠伸
慮傾側忽然壓面高車來御者意氣如風雷揮鞭叱汝
讓中道道左還噴礙邊套可憐排擠入坎中兩人推挽
力亦窮此客張皇意消沮道旁強就老翁語大腹高臥

車中人得毋官長非平民老翁笑容見何淺世路傾欵
原不免人生貴賤視所乘彼此易位仍相陵

辦公館

又

辦公館縣符下催里胥悍店家殷勤一尊款此店今宵
客正滿下番當差不嫌緩東家主人不解事官封去貼
公館字傳呼大府卽日來一一供頓須單開別儲酒肉
犒廉從店旁更借民房用辦公館張燈紅斷木似行馬
裁布爲屏風茅屋居然作官廨客問雞豚不敢賣治具
連宵數擊鮮主人守候殊可憐縣中幹役如狼虎敢問
當官飯食錢

灘師

李補平

長灘三百里一灘一洄洑長年卽灘師藉手延尊宿一
師當船頭左右點篙竹一師船尾立把舵如槁木半日
上數灘計里亦神速問師技至此毋乃巧於熟師云心
專壹不係手與目大石如尊官袍笏何雍穆小石如奴
隸環侍刀劍簇我舟出其前道在勿與觸迎風漸夤緣
得水隨屈曲要津已高據尤宜緩相逐總看石喜怒以
爲舟往復譬宦海波濤此理可照燭狂直與戇愚無益
祇取辱惟能柔道行斯可千百祿我聞味斯言言外理
悅服再拜謝灘師險途得平陸

渡水沙二首

屠倬

水沙十里江一里沙擁江平一條水荻花吹盡晚潮枯

腳踏堅冰人凍死

是日聞死者三人

鴛鴦叫空飛不落牛領成

創苦鞭捶嗚呼渡江先怕渡水沙無錢不上獨輪車

月黑沙淤不見路五更早候西陟渡水深沒蹶不敢住
行李先催過江去瑟瑟津鼓城頭擗樹枝霜白啼老鴉
嗚呼渡江先怕渡水沙擔夫日被官差拏

大道行

周凱

三月易道路九月成徒杠

周十一月

王政有定時無論大小

邦襄陽況當九省衝秦黔燕豫多客蹤車如流水馬如

龍胡爲崎嶇而屈曲天雨泥濘慮顛撲馬行沒脛車脫
輻抄徑入田疇禾麻遭荼毒行者愁苦耕者哭我爲爾
民計爲利殊有四經涂九軌環七軌周以溝洫實古制
既可利人復自利曷不舍爾道旁尺寸地官道本自有
定式我今三丈以爲則兩旁取土掘深溝溝廣十尺深
十尺爲道必期成周行爲溝切勿逆地防道旁任爾各
栽種棗柳乃是易生物一年自青青兩年何鬱鬱亦旣
便行旅又復滋稼穡樹木可以佐棘薪深溝可以防盜
賊每歲農隙時不惜數夫力挖溝翻土封爾植不愁行
人踐爾禾何至爭競尋矛戈居者獲利行者歌爾民試

看襄陽城城中大道如砥平白石鑿鑿相縱橫爾但齊
心工易成聽我長歌大道行

盤灘謠

姚椿

撞高金擊大鼓擎千篙止萬艣前招後柁衆力舉絳繩
百丈人蟻附有時山頂行有時乃以小舟渡水勢沒石
石力拒石勢出水水力怒失勢一漩落深處倒空橫飛
疾於羽人不得轉瞬物不得主坐待其定色慘沮以十
挽之一不補吁嗟乎上灘兮灘已勞役夫一呼風怒號

放灘謠

又

自蜀入楚灘不可數舟如飛花石上舞猿聲悲鳥聲苦

亂流迴漩石齒虎距長年二老擊木牌衆工頓足萬橈
舉篙師當頭魚龍怒吾欲擊之恐予侮搖手戒弗語強
者危坐懦者色如土前灘後灘號呼聲古來挂骨何處
所吁嗟乎下灘兮灘已危客子出險涕漣漣

馮詢石橋謠見橋梁門

沈起潛入圻行見盜賊門

倚閭歎

徐恭儉

朝倚閭暮倚閭倚閭不至雙淚枯哀哉游子何其愚失
意曷弗歸田廬

解一

行路難依人苦倚閭人酸肺腑汝

飢汝寒誰與語欲往從之道脩阻

解二

獸亦知返哺鳥

亦知倦飛悔將送別淚灑上游子衣西風落葉打門響
夜涼恍惚行人歸三解天蒼蒼兮雲脈脈倚閭人兮痛

沾臆杜鵑啼血哀猿叫月悠悠天涯魂夢斷絕胡不思

倚閭人難再得四解

颶風行

庚子十月初八日遼陽大風上海沙船之
在洋者覆沒七十餘舟閩商賈之艱爲作

是詩

王慶勳

吳頭一水遼陽通羣舟航海憑神功凍雲忽起接蓬島
那禁狂雨兼狂風狂風吹海海水急十丈洪濤夾船立
卸帆不及力難施滿船性命懸呼吸一波未平一波生
此身真似鴻毛輕入險出險且未暇奚遑來救他人傾

吁嗟乎少小離家爲謀食未必微利營皆得百年計較

千年心

用

人鬼無端判頃刻人生何業不可爲行舟奚

止三分危

諺語行船走馬三分命

古今航海幾人返聽命向若心

先癡君不見山頭十圍老樹風拔攝何況茫茫大海之
中舟一葉

過四天門

在井陘平定界上卽太行支山俗爲是名

巖

辰

縑生

舟行畏瞿塘車行畏太行憶昔下三巴每戒如馬航七
年長安道王路遵平康忽有萬里行取道燕趙疆
太行山延袤千里長到此第幾陁起伏多崇岡天門四
方高東與南最強東乃上山險我馬病元黃南則下山

危我車憂覆汪御者宿戒備喚馱分行裝上山必打眼

車至半坡欲暫息則以石子墊車輪名打眼聊息汗馬忙下山持挂木

下山以一

木橫挂輪後則車去較緩否則難收繯車制隨地殊攷工所不詳前

軒忽後輕人如鳥頡頏左顛復右倒又如箕簸揚有時

陷碾淪宛若穿運方車輪與石鬪終日聲雷碾老妻挾

幼女一手扶車箱所慮軸或折不死亦被創兩僕負二

女足繭蹲道旁我舍車而徒一步一踉蹌日行止半程

投宿已夕陽心折骨亦驚夜夢猶惶惶山頭奉伏魔廟

貌非尋常不覺膝自屈懍懍祝瓣香人生蹈險難不免

信祈禳出險戒心弛後車偵康莊平地有風波何必馳

帆檣所以聖賢心戒懼不敢忘

亂離

吳偉業葦山兒見鬻兒女門

梁清標空城吟見兵事門

野店篇

施閏章

祁陽山中斷行旅萬嶺參天天欲雨松杉百里一茅店
椎髻老翁作蠻語土垣半倒撐樹枝白日空庭走飢鼠
驚看上客車馬多卻立低頭色如土連年此地莽邱墟
行人露宿飼豺虎生兒箆中已八歲不識門前樹禾黍
官來給種新買犢臥無莞簟炊無釜遺黎擊柝夜燔薪

防虎中宵有伏弩客聞歎息亦吞聲亂後天南鮮安堵
吾語老翁汝勿苦日暮壺漿不索汝過吏遊兵慎莫隕
主人去此適他所

我昔三首

吳嘉紀

我昔客途逢敗兵弦聲旆影魂俱驚殘騎如狼散草莽
居人雜兔奔縱橫漁船貪利夜賣渡金多方許載人去
暝色潛行曙則隱口乾腸飢我能忍

我昔攜家亟逃難海雲漫漫晝昏晏野空蹄響賊馬近
我船欲速行轉慢須臾燔燒間里紅風漂船入蘆港中
蘆葉荻葉蔽男婦引衣掩塞啼兒口

我昔兵過獨還家
畦上觸體多似瓜
空邨無聲雞犬盡
籬菊自放霜中花
天南伯兄天北季
驚魂棄絕故園地
夜寒鬼語聚稍稍
細雨還聞九頭鳥

難婦行

壬寅六月瓜州事

又

甯爲野田莠不爲城中婦
莠生雨露培婦命如塵埃
江頭六月舉烽燧東南風
吹戰艘至官長首嚴出城
禁嬌娃豔婦縮無地愚者
爭向船艙匿覆木覆石水
關出木下石下填人膚日
蒸氣塞人叫呼舟子耳聞
眼不顧往來邏卒逢無數
短篙刺刺漸離城听上骨
月喜且驚夫來挈妻父挈
女開艙十人九人死吁嗟
乎城外天地寬

如此此身得到已爲鬼家人畏罪不敢嘔紅顏亂葬青蒿裏

梁社河邊行見流民門

吳遵鐵應城行

邵長蘅京口行訛言行

並見兵事門

歸家歎

康熙十九年
吳逆初平

許國煥

捷書騰山谷晨裝促雞鳴
王師夜半入傳聞收郡城
就中招流亡王官語分明
收淚卽歸途負挈戰場行
迴邊望餘燼腥血踐鮮頰
骸骨無一全枕藉形縱橫
念之皆赤子誰甘叛逆名
迫脅豈所欲骨肉空伶仃

行行識溪山陰風吹落日
四顧無居人荒煙冪空室
心

神傷虛響徐入疑復出房闔交獸蹄朝菌生牀席鹵莽
辦一炊草草不能咽。冤鬼寒索羣。邱隴聲相迹。夜黑天
容昏。妻孥悄無色。

里正聞人歸臨門相詬責郡帖昨夜下誅求按逋籍軍
前供億繁官衙急私役恣睢鞭朴橫喪亂不汝惜念我
去田廬劫奪無寸積粒食絕經年野草無可摘君看庭
瘠形詎足供悉索行脫豺狼吻且當猛虎噬天命乃如
此痛哭巡檐隙支離終人生苦患何時釋

難民謠

咸豐辛酉賊
擾西江作

鄒端

城上壤雲似人立淒風慘慘吹賊入喧闐沸騰忙殺人

血飛如雨刀聲疾刀聲疾哭聲哀死尸撐距腥風來少
壯繫之去老弱靡孑遺初時有金命可續金盡仍然罹
其措自辰至酉始封刀慘呼震地哀聲肅劇憐嬌小婦
深藏將哺子子未離母腹母被賊淫死所幸城中多井
復多塘迺是烈女貞婦之首陽紛紛逃竄死無地父母
離兮妻子棄壯者捉之去衝鋒幼者名之小把戲可憐
倚閭待兒歸年年望斷解重圍重圍未解賊又至滅門
絕戶餘幾希烏虜滅門絕戶餘幾希縱有存者死有時

塗泥逃婦歎

于慶元

盈盈浣紗溪佼佼溪邊女女兒生小朱樓中嬌癡不解

行路苦煙氛起海濱到處多橫行白晝入人室不辨賊
與兵女隨母走婦挈姑出門茫茫何處趨十步九倒足
趨起遺簪墜烏滿路隅行行日未斜道逢無賴紛如鴉
匍匐飲泣何所恨恨我父母胡爲生我顏如花手掏道
旁泥垢面復塗體蓬頭赤腳日夜逃汚辱難湔泥可洗
官符來急追問汝去何之汝不見鴛湖三十六鴛鴦軍
門日日圍紅妝

新樂府
諷流寓

張興烈

北風莽莽鴻雁號銜蘆東來浮海濤故巢回首苦憎媿
乃欲結隊棲蓬蒿蓬蒿何長稻梁短毛羽襤褸漸豐滿

幕燕檣烏共頡頏鄉心無復驚蘆管吳閩富兒雄於財
閨闔峩峩甲第開朝歌暮舞樂莫樂錦天繡地金銀堆
堂上何所有迤邐絃索蒲桃盃堂下何所有五花駿馬
金鞴鞅投壺六博絲竹肉纏頭明錦紅玫瑰居安忘危
天降災賊騎乃自閩門來盡攜妻子出門走神色沮喪
心悲哀黃者金白者玉捆載而行滿囊匱可憐華屋換
山邱那識宴安是酖毒連雲市肆滬濱城望衡對宇縱
復橫尋源到此一枝借依然繡闥連丹甃人生行樂苦
不足窮途况復難爲情蘭陵美酒玉椀盛中山一飲千
日醒名倡宛轉調錦箏大絃小絃變徵聲噫吁嘻此間

樂兮不思蜀賸有王孫道旁哭欲求厭亂復天心亟待
還酒變民俗公莫舞聽我歌我歌不樂將奈何請看舊
日監門畫莫戀他鄉安樂窩

疾病

麻風院

宋翔鳳

嶺表有異疾卑溼感毒淫始發桃李容紅暈頰輔深瘡
散成斑連周身靡不侵面目久模糊語莫辨其音蘊熱
吐臟腑出氣難自禁親戚棄不顧道路見悉暗此實天
所困宜傷仁者心聞有麻風院養之匪自今所恐傳不
衰流禍方駸駸何不究祝藥更與謀刺鍼入肆盡下醫

方孰傳千金地氣無發斂四時苦炮燂庶修改火令或
者消疹禳

痘詩付彭孫

祁寓藻

北宋前無治痘方字書孳乳亦未詳董君汲斑疹論已

佚周

密趙賓陽

數語其濫觴斑犀玳瑁髮髯似陳家小

兒黠花面妝元明以後診法備仁端錄始徐仲光明徐謙

探索羣書著理辨專門繼者祁門汪機明人著痘疹理辨大抵胎

元主一說歲氣之論初於黃元御國朝人以上見四

詩載文苑英華或云武谿蠻流毒薏苡傳會殊渺茫李時珍說或云

藥自遼入汴時醫口傳難校量人情嗜欲如沸湯以酒

爲癡妄爲常卽謂先天氣所稟何至近代疾始彰若使
歲氣由瘟疫何以一發不再卽疹雖似痘痘非疹以今
攷古數典忘竊疑古者重改火鑽木以時傳燧皇施諸
飲食逮乳哺襁褓或免瘡與瘍木火究殊石火烈縱有
疾病差易防清明日賜百官火古風沿襲終李唐宋初
此舉尙不廢石泉槐火存斷章自從石火取攜便木乃
休囚火遁藏星吞電吸灼肺腑冬愆夏伏乖陰陽遂令
二豎巧乘隙出入鼻息潛膏肓虛實攻補議蠡起百草
亂門誰敢嘗金童玉女環守牀求醫不得祈神禳時俗小兒
出痘必祀痘神豈知中醫常不藥和緩孰是古之良仰瞻金鑑

補造化種痘有術同時秧

欽定醫宗金鑑有種痘一門

庶幾十全百

不失物無天札天降康昔我孩提今老蒼抱孫就塾若
有望先時培植病未遑猶幸醫藥愼所當俸錢獨媿民
流亡保赤無力心暗傷期爾黃犢頭角強它日爲翁勝
服箱作詩念哉孫彭郎

秋疫歎

嘉慶庚辰夏旱永豐尤甚秋復大疫死者相枕藉

郭儀霄

天地本好生劫數憑誰補陰陽一失序造化難自主今
年值亢旱數月失霖雨炎歊鑠肌骨煩毒煎肺腑自從
入秋來大疫遍蓬戶桁上無完衣盎中無粒黍殘喘豈
能延哀哉命如縷

山墟藥石貴典衣聊相酬黠賈混眞贗安望病可瘳况
無秦越人補瀉恣誤投病多時醫競術淺貧家求殺人
以爲利庸醫誠可愁

路逢白衣人荷鋤步層岡逡巡草間臥骨立面瘦黃云
是八口家隻身未罹殃前日老父死昨夜阿母亡兄弟
後先逝藁葬南山陽庭寂不敢入靈座纍相望鬼氣悚
肌髮喪容悽尸堂慘語不忍聽欷歔向穹蒼

江鄉重巫鬼舍醫更問卜日者談吉凶廟子悚禍福黃
冠利解禳朝暮紛相逐曠野夜招魂悲呼動林谷此輩
豈知道營營飽錢肉謬言可勿藥求神罪可贖鉦鼓滿

四鄰哀吟上黃牘不見靈神來。惟聞舉家哭。

天花歌爲邱浩川上舍

賦

張維屏

天花權輿自何時談秦說漢多無稽黃岐雷桐洞百病
吁嗟此事胡獨遺何辜黃口受斯厄天行劫至孩提危
痘苗塞鼻古有法得失參半兼醇疵異哉爾牛亦患痘
新方海外傳島夷其法剔臂稍見血牛痘之漿輕納之
由牛及人一遞百勿藥有喜無差池或云坤德秉質厚
或謂嗜慾惟牛稀當時寸鐵突相向意在取痘牛弗知
一牛穀觶萬家喜仁術至此真難窺乍聞我亦半疑信
驗諸目擊言非欺始由紅暈至痂脫計日而愈無愆期

但看雙珠出雙臂折肱安用誇神奇由來種痘比種穀
茲瑞亦可名雙歧天花嘉種肯散布何異甘露分楊枝
乃知人事補天憾一手可活千嬰兒邱君習此思濟世
誠求保赤心實慈衆人之母君克任豈獨十全爲上醫

知病吟

彭蘊章

知病不知藥黃帝內經空糟粕知藥不知病神農本草
戕性命知病知藥求宿瘳毒藥何異吞戈矛元氣暗損
盧扁愁更有未病先服藥自謂攝生莫我若反招二豎
來作惡吁嗟乎隔垣之技世無人但當食粟飲水全天
眞

紀疫

辛巳六七月江浙大疫自夏徂秋死者無虛日目擊心慘不能無詩柳樹芳

憶自甲戌秋旱魃曾爲虐是冬盛疫火入春尙如燭訛
言兩年中疫氣相間作厥後亦罔驗陰陽難揣度比來
屢豐年戶口占和樂尋常屢膏粱幾不識藜藿緣何至
今夏人死如隕瘁始從足上起俗名曰釣腳一冷脈垂
絕十指盡被縛腸胃先已傷肌肉登時削往往一飯頃
便不可救藥人言鬼作祟縱疫爲擊搏何弗禱於神羣
將性命託簫管聽沸騰鉦鼓看舞躍奉牲極肥腩設醴
汰糟粕朝入廟嬉遊暮歸氣已索方知中有數非鬼敢
肆惡死生豈細故究誰主冥漠君子先慎疾疹氣無由

著愚氓味養身。易爲暑薄聞昔乾隆初

元年
丙辰

貴州訴

民瘼凶厲盛流行老弱轉溝壑屈指八十年太平尙如
昨振作自天心聳贖警木鐸或者役人渡以懲薄俗薄
樹芳又有苦旱疫火吟見旱災門

驅疫行

吳淮

東家小兒沸若狂西家老嫗焚香忙六街如水疫鬼避
城隍神出驅瘟瘧紙錢堆處高於山享鬼賂鬼鬼益頑
故鬼拍手新鬼哭啾啾唧唧城闔間五門太保多如螻
口作咒語手焚牒但教出城莫入城城外之鬼神無涉
神若有言人不聞一城內外何區分爾曹遷善但改過

天怒自霽消災氛，城隍神回日未落。哭聲又聽城中作，
醫術

誅庸醫

景星杓

醫者德之宗，人命重所倚。神農味草木，軒岐通諸唯。古
人惜已遠，良矩日就毀。遂令市井兒，得以變厥軌。華軒
敞高楔，輕裘曳文履。出則僕從都，傾座騁談齒。唯時紛
指畫，引經出別解。聆其纏纏言，彷彿寓至理。無何造牀
榻，按脈聊半指。口復敘朝事，縉紳若流水。夷然把藥籠，
驕倨殊自喜。不復詳主客，何暇論佐使。銜贈多黃金，要
約索券紙。徒誇起生訣，乃爲速死鬼。吾聞七首利濡縷，

試輒死豈若庸醫速驗在呼吸耳不藥爲中醫斯諺有
微旨人命非草菅天道故自邇殃慶以類至慎哉懸壺
子

醫說

諸朝棟

諺云儒學醫醫諸菜作齋世遂謂其易人人願學之學
之苦不精人命等兒嬉人身一天地五臟應四時疾病
有標本陰陽互推移斯道通造化淺學豈易爲今之業
醫者流弊更益滋不以古爲法庸陋輒自師藥性僅粗
曉脉理全未知妄云祖河間或說宗丹溪詎悟大道源
發洩自軒岐靈樞與素問昭如日星垂畏難置不講古

學遂凌夷。諸家如聚訟。僅各得其支。非不抒妙理。立言多瑕疵。能闡靈素秘。千古惟張機。世人徒涉獵。疇能窮指歸。一知與半解。遽誇道在茲。有時臨重證。束手空嗟咨。虛實旣莫辨。表裏猶遲疑。寒熱或倒置。攻補且誤施。一藥苟誤施。千騎安能追。強言委命數。其顏終忸怩。鄙人竊有志。頭白慙管窺。敢謂世無賢。學者請慎思。讀書貴具眼。能別是與非。治病必求本。莫尋葉與枝。執方竟何益。窮理始有裨。志欲比良相。道在燮兩儀。兩儀誠能變。身世皆期頤。

紀醫

侯學詩

朝來體中極兀然臥東軒爰有緩和流進我以苦言其
言陰與陽偏勝乃爲患陽偏濟以陰要令適得均過劑
反復勝患亦如轉環以衡較輕重豈可令輕軒改絃或
使急絃絕那得彈世人多自治但取快一端不如此國
工獨能知本原

醫

徐鑠慶

醫者意而已此論殊不然寒暑辨庶物陰陽應周天靈
樞橐鑰握草木人命懸貴審受病所織芥秋毫顛輾轉
中腴理骨髓詎可填痛彼庸手醫鍼砭法不傳治指不
顧臂持後不計前伏邪未盡退交戰驅鷹鷂引盜入臥

內閉關操戈鋌貴人重性命豈惜揮金錢百萬易蕩草
坐列娥眉煎誤投甚鉤吻促迫鬼伯鞭又或騁攻伐大
水灌百川寇賊縱悉祛城郭早失堅人生有要道貴操
元氣全人病脉不病羸瘠猶永年脉病人不病蜉蝣暮
堪憐安得醫國手上壽齊彭錢

論醫錄三
首

錢師會

輓近芸芸富七情勞生血氣少和平書中盛盛虛虛戒
幾輩醫家認得明

爲醫第一要心虛其奈當場意氣驕引入膏盲無著手
初時致誤後模糊

病者妻孥苦候門喧呼車到已黃昏燈前一按恩恩去。
指下何曾見病根。

嘲醫

羅以智

不解庸醫輩偏能進古方如何投藥石反令入膏肓酬
應名徒在馳驅業早荒此公聲價重高閣合身藏

楊癆醫

曹憲馨

兩人前導乘飛輿譙樓統統三鼓初病榻延頸醫者至
肅坐未定神他趨楊生異乎彼鄙夫縕袍破帽騎疲驢
藹然之氣絮然語急人之疾如切膚昔我患瘍正瞑眩
施我一鍼毒早除畸人神技世所罕念不求利祇讀書

葆兒學醫詩以勉之

閩汪嫫媛

聞兒學醫我心甚喜古人知醫乃爲孝子我身多疾今
無慮矣試兒工拙自醫我始

聞兒學醫我心甚憂脈象至幻指下悠悠陰陽虛實冥
心索求蒼生司命曷以寡尤

醫並良相功無津涯擇我兩說各成名家一博羣書折
衷長沙一師仲景莫知其他

兒旣學醫先宜保身此事難知匪云救貧慎重以往妙
手回春膽大心細法孫真人

祭祀補

詠祀鄉賢事

陳翊勳

人生不朽三立德爲之本立言與立功有本末斯顯所
以古之人貴乎敦實踐孝友里閭稱謨烈 明廷展奈

何小有才便入鄉賢選

林昌彝云祀鄉賢類多
濫廁此詩切中時弊

喪葬補

雜詩二十首
之一

朱彝尊

東京厚風俗士行本學校必先親其親使民知則儆於
時重喪紀期功相答效至或自解官居憂立名教奈何
今之人母死不作孝舍爾苴經製有醜酒肉貌首邱死
者狐首山死者豹鮮民之不奔曷以掩泉窆誰哉生厲

階仕路巧騰蹕

掩埋補

林昌彝射鷹樓詩話曰多葬停棺亦禦旱之一策
南方人多厝停不葬其甚者以木桶瓦罐箴貯之
又有客死無人過問者以至日久暴露荒郊游魂
無歸往往助旱魃爲虐皖江汪稼門先生志伊撫
浙督閩籌葬資委各州郡賢員協同地方官逐處
查明將無主及有主無力者妥葬官山標記勒小
碑其有主有力者諭勸依限速葬報竣者以萬千
計先生述懷詩云欲酬大旱雲霓望徧瘞荒郊暴
露棺此舉
實善政也

亂離補

贈王昊廬宗伯

澤宏○吳逆之難宗
伯捐貲贖難婦百餘
沈用濟

紅淚千行濺鐵衣傾家不惜拔重圍揮金欲笑曹瞞吝

只贖文姬一箇歸

醫術補

林昌彝詩話載祝止堂侍御德麟論醫詩云庸醫
難與謀以藥試人疾欲生是其心致死是其術似
摘句非全詩今不得悅親樓集一證之矣又載長
樂陳賓有善醫嘗有句云但覺此心如父母莫教
下藥誤君臣

國朝詩鐸卷二十三終